

SAMOA

Faatulagaina o Aiaiga

VAEGA 1 FAATOMUAGA

1. Igoa puupuu ma le amataga
2. Faamatalaina o uiga o upu
3. Sini o le Tulafono
4. Tulafono e noatia ai le Malo
5. Uiga o galuega aoao tau meli
6. Uiga o galuega faaagaga tau meli
7. Uiga o galuega tau meli faapisinisi
8. E mafai e le Minisita ona tuuina atu faatonuga i le SamoaPost

VAEGA 2 SAMOAPOST

9. SamoaPost
10. Faailoga tusi tau meli
11. Noataga lautele faale-Malo
12. Tuutuuga ma aiaiga o galuega tau meli e tuuina atu e le SamoaPost
13. Faiga faavae o le faatulagaina o tau
14. Taulumaga e faagaoioia ai a le SamoaPost

15. Tulaga faataatitia o faatinoga ia ausia e le SamoaPost
16. Manaoga tau lipoti
17. Nofoaga o galuega tau meli
18. Pusa meli
19. Tuueseeseina o galuega faaagaga tau meli ma galuega tau meli faapisinisi
20. Faamatalaga tau tupe a le SamoaPost
21. Puipuigamalu mai nisi tagi
22. Solia o se galuega faaagaga tau meli

VAEGA 3 O GALUEGA TAUAVE MA MALOSIAGA O LE PULE FAATONU

23. Matafaioi, galuega tauave ma malosiaga o le Pule Faatonu
24. Talosaga Tetee ma Iloiloga o Poloaiaga a le Pule Faatonu
25. Ia lipoti atu e le Pule Faatonu le tausisia o tulaga faataatitia o faatinoga ua faatonuina ma isi mataupu
26. Tulaga tutoatasi o le Pule Faatonu

**VAEGA 4
TATALAINA MA LE
SUEINA O MELI**

27. O mea tau meli e lē mafai ona faaooina atu
28. Mea e toe faaleleia
29. O mea tau meli ia e mafai ona totogiina tiute
30. O mea tau meli ua talitonuina o lo o aofia ai vailaau faasaina po o isi mea faasaina
31. O mea tau meli ia i ai faatasi ma se faasilasilaga o le tatalaina
32. Tagofiaina o mea matautia po o mea oona
33. Lafoaia i le tuanai ai o se moliaga faamaonia faaletulafono
34. E lē noatia le SamoaPost ma tagata faigaluega mo gaoioiga e faia i le agaga lelei i lalo o lenei Vaega

**VAEGA 5
SOLIGATULAFONO E
FAASINO I LE TULAGA
ALOAI A O MELI**

35. Tatalaina e aunoa ma se faatagaga o mea tau meli

36. Faailoa atu o faamatalaga e maua mai i mea tau meli
37. Gaoia o mea tau meli
38. Faaoo atu i se tulaga lē sao o mea tau meli
39. Faailoga tusi tau meli ua sainia faagaoi
40. Faaaogāina o faailoga tusi sa muai faaaogāina, faaleagaina foliga po o ua tapeina
41. Faalavelaveina o le feaveaia o mea tau meli i le meli

**VAEGA 6
SOLIGATULAFONO
LAUTELE**

42. Lafoina i le meli o mea matautia ma isi mea faapena
43. Faapogai i le aveina o vailaau nakoti i le meli
44. Satiaina o pusa meli

**VAEGA 7
AIAIGA ESEESE**

45. Tupe faapoloaiga ma tupe faapoloaiga e lafoina i le meli
46. Tulafono Faatonutonu
47. Soloia

2010, Nu. 30

O SE TULAFONO e faavaeina ai se taiala faavae ma faatonutonuina ai le tuuina atu o galuega tau meli i totonu o Samoa ma faamoemoega e fesootai i ai.

[19 Oketopa 2010]

UA FAIA e le Fono Aoao Faitulafono a Samoa i totonu o le Palemene ua potopoto e faapea:

**VAEGA 1
FAATOMUAGA**

1. Igoa puupuu ma le amataga-(1) E mafai ona taua lenei Tulafono o le Tulafono o Galuega Tau Meli 2010.

(2) O lenei Tulafono e amata faamamaluina i le aso e tuuina i ai le maliega a Le Ao o le Malo.

2. Faamatalaina o uiga o upu-(1) I totonu o lenei Tulafono, ae vagana ai ua ese le faamoemoe o aliali mai:

“galuega tau meli faapisinisi” o lona uiga o se galuega tau meli o faamaoti mai i totonu o le fuaiupu 7;

“tagata sa ia pulea muamua” e i ai lona uiga tutusa e pei ona i ai i le Tulafono o Nakoti 1967;

“feagaiga” o lona uiga o se feagaiga lea o lo o avea ai Samoa o se vaega auai po o se maliega po o se feutagaiga i le va o Samoa ma se atunuu i fafo;

“pepa mataga” e i ai le uiga tutusa e pei ona i ai i le Tulafono o Lomiga Faasalalau Mataga 1960;

“sootaga o fetaulaiga o masini o fesootaiga” o lona uiga o le sootaga faitino o galuega tau meli o lo o faafoeina e le SamoaPost faatasi ai ma galuega tau meli o faafoeina e se isi kamupani o tuuina atu galuega tau meli;

“Minisita” o lona uiga o le Minisita o lo o nafa ma Fesootaiga;

“Matagaluega” o lona uiga o le Matagaluega o lo o nafa ma fesootaiga;

“nakoti” e i ai lona uiga tutusa e pei ona i ai i le Tulafono o Nakoti 1967;

“Tagata ofisa o le Tiute” e i ai le uiga tutusa e pei ona i ai i le Tulafono o le Ofisa o Tiute 1977;

“Pusa meli a le Fale Meli” o lona uiga:

(a) o se mea e fafao ai ua fausia e le SamoaPost mo le faaooina atu o mea tau meli; po o

- (b) o le tuatusi e faaooina atu i ai meli i se nofoaga o galuega tau meli lea o lo o aofia ai upu “Pusa meli a le Fale meli”.
- “leoleo” e i ai le uiga tutusa e pei o le “Tagata Ofisa Fai-Pine” i le Tulafono o Galuega tau Leoleo 2009;
- “totogi e lafo ai mea i le meli” e faasino i se mea tau meli, o lona uiga o le aofaiga o tupe e mafai ona totogiina mo le aveina o se mea i le meli.
- “faailoga tusi e lafo ai tusi i le meli” e aofia ai se faailoga oomi po o se faailoga lolomi, pepa e faailoa ai po o se mamanu ua faatagaina e le SamoaPost mo le faamoemoe o le totogiina o le totogi e lafo ai mea i le meli ma se mea tau meli ma so o se isi lava faamoemoe e pei ona manaomia e le SamoaPost ma le upu o tusia ai, “Samoa”;
- “mea tau meli” o lona uiga o se mea o se ituaiga e faapea, i lalo o tuutuuga ma aiaiga lea e tuuina atu ai e le SamoaPost galuega tau meli, e mafai ona aveina e le meli;
- “nofoaga o galuega tau meli” o lona uiga o se nofoaga ua faailoaina e le SamoaPost mo le tuuina atu o galuega tau meli ma e aofia ai se fale, fale tetele, potu, nofoaga po o fausaga lea e mauaina ai, faaooina atu, faavasegaina ai mea tau meli i le faatagaga po o i lalo o le pule faataga a le SamoaPost, po o o lo o faia mai ai po o lea o lo o tufaina mai ai mea tau meli;
- “pusa meli” o lona uiga o so o se mea e fafao ai ua fausia e le SamoaPost mo le faatoaiga, mauaina po o le tagofiaina o mea tau meli;
- “Pule Faatonu” e i ai le uiga tutusa e pei ona i ai i le Tulafono o Fesootaiga 2005;
- “galuega faaagaga tau meli” o lona uiga o galuega tau meli ua faamaotiina i totonu o le fuaiupu 6;
- “vaega i nuu i tua” o lona uiga o so o se vaega i tua atu o le ono (6) maila mai le ogatotonu o le lio faataamilo mai le Uati i le Taulaga o Apia;
- “SamoaPost” o lona uiga o le kamupani a le SamoaPost Ltd ua tuufaatasia faaletulafono i lalo o le Tulafono o Kamupani 2001;

“Taulumaga a le SamoaPost e faafoe ai” o lona uiga o taulumaga e faafoe ai ua faatulagaina mai i taiala ua saunia i lalo o le fuaiupu 14;

“o lenei Tulafono” e aofia ai tulafono faatonutonu ua faia i lalo o lenei Tulafono;

“galuega aoao tau meli” o lona uiga o se galuega tau meli ua faamaotiina i totonu o le fuaiupu 5;

“Tulafono Faatonutonu a le Iuni o Galuega Aoao Tau Meli” o lona uiga o le Feagaiga a le Iuni o Galuega Aoao Tau Meli ma Tulafono Faatonutonu Lautele a le Iuni o Galuega Aoao Tau Meli ma e aofia ai pepa faaopopo, tulafono ma tulafono laiti ua faamatalaina, faatulagaga i na tulafono faatonutonu ma so o se maliega faaopopo o tulafono faatonutonu ua lomia faasalalau e le Ofisa Faava o Malo o le Iuni o Galuega Aoao Tau Meli ina ia tusa ai ma le maliega ua malilie i ai pulega tau meli a atunuu o avea ma sui auai o aafia i totonu o le Fono Aoao a Sui o le Iuni o Galuega Aoao Tau Meli.

(2) Ae vagana ai o se faamoemoe e ese ai o lo o aliali mai, o so o se upu po o ni fuaiupu o faaaogā i totonu o lenei Tulafono ma e le o faamatalaina i totonu o lenei Tulafono ma faaaogā i totonu o Tulafono Faatonutonu a le Iuni o Galuega Aoao Tau Meli e i ai le uiga tutusa po o le faamatalaina o uiga o upu ua tuuina atu i ai i totonu o Tulafono Faatonutonu a le Iuni o Galuega Aoao Tau Meli.

3. Sini o le Tulafono - O le sini o lenei Tulafono o le faavaeina lea o se taiala lelei faaletulafono ma se taiala e faatonutonu ai ina ia mautinoa ai o lo o faafoeina le alamanuia o galuega tau meli i se siosiomaga faatauva, mafai ona avanoa i ai, lelei ma gafatia mo tagata o nonofo i Samoa.

4. Tulafono e noatia ai le Malo - O lenei Tulafono e noatia ai le Malo.

5. Uiga o galuega aoao tau meli - I totonu o lenei Tulafono, “o galuega aoao tau meli” o lona uiga:

- (a) o le aoina, felauaiga ma le faaooina atu o meli a le atunuu ma meli faatuatusi i tuaoi fesopoai i tagata o lo o faatuatusi i ai i vaega ua taua e faapea -
 - (i) tusi faatuatusi i le mamafa e lē silia le 100 kalama; ma
 - (ii) afifi laiti i le mamafa e oo atu i le lua (2) kilo kalama; ma
- (b) le aoina, felauaiga ma le faaooina atu o afifi tau meli a le atunuu ma afifi tau meli faava o malo, e oo atu le mamafa i le 20 kilo kalama; ma
- (c) le tuuina atu o poloaiga tau tupe feaveai i le meli ina ia ogatasi ma tulafono faatonutonu a le Iuni o Galuega Aoa Tau Meli; ma
- (d) le tuuina atu o auaunaga faapitoa e pei o meli puipuia ma mea taua taitasi ua faailoa; ma
- (e) le tuuina atu o Pusa meli a le Fale Meli i nuu i tua ititi mai le aofai o tagata o nonofo ai o le 3000 po o le tuuina atu o nofoaga o galuega tau meli i nuu i tua o nofoia e ni tagata se 3000, e ono mafai ona uia auala o le Malo; ma
- (f) le tuuina atu o faailoga tusi tau meli; ma
- (g) le fesuiaiga o meli o lo o feaveai e ala i nofoaga tutotonu o faavasegaina ai meli.

6. Uiga o galuega faaagaga tau meli - I totonu o lenei Tulafono, o “galuega faaagaga tau meli” o lona uiga:

- (a) o le aoina, felauaiga ma le faaooina atu o meli tau le atunuu ma meli faatuatusi i tuaoi fesopoai i Pusa meli a le Fale Meli i vaega ua taua e faapea -
 - (i) tusi ua faatuatusi e lē sili atu i lo le 100 kalama le mamafa; ma
 - (ii) afifi laiti e oo atu o latou mamafa i le lua (2) kilo kalama; ma
- (b) le aoina, felauaiga ma le faaooina atu i Pusa meli a le Fale Meli o afifi tau meli a le atunuu ma afifi tau meli faava o malo e oo atu le mamafa i le 20 kilo kalama; ma

- (c) le tuuina atu o tau faapoloaiga tau meli ina ia ogatasi ma tulafono faatonutonu a le Iuni o Galuega Aoa Tau Meli; ma
- (d) le tuuina atu o Pusa meli o Fale Meli; ma
- (e) le tuuina atu o faailoga tusi tau meli.

7. Uiga o galuega tau meli faapisinisi - I totonu o lenei Tulafono, o “galuega tau meli faapisinisi” o lona uiga o se galuega tau meli e le o se galuega aoao tau meli ma e aofia ai:

- (a) meli uma ua faatuatusi e le i faaooina atu i Pusa meli a le Fale Meli, ae sa faaooina atu tuusao i le tagata o faatuatusi i ai e avea o se meli ua faaee i ai le tau;
- (b) meli e le i faatuatusiina ma meli o faasalalauga faapisinisi;
- (c) meli mai tuaoi fesopoai e le i faaooina atu i Pusa meli a le Fale Meli, ae sa faaoo tuusao atu i le tagata o lo o faatuatusi i ai;
- (d) afifi tau meli o se meli o mea taitasi o lona mamafa e sili atu i le 20 kilo kalama;
- (e) o auaunaga uma tau meli e le i faaooina atu e tagata ave feau ma galuega tau meli televavave e le i faaooina atu i Pusa meli a le Fale Meli, ae sa tuusao atu i tagata o faatuatusi i ai ua avea o meli ua faaee i ai le tau, faatasi ai ma nisi auaunaga faasili, e pei o faailoga aloaia e taofia ai mo le sailiga ma le sueina, o mea taitasi ua inisiuaina ma ua faamaonia le faaooina atu i taimi faatulagaina;
- (f) o auaunaga uma tau meli ua faaee i ai le tau i fafo atu o le aotelega o Galuega Aoa Tau Meli (UPS), e pei o uluai gaoioiga tau meli e aofia ai le faatuatusiina, lolomiina, faaofiina ma le faatulagaina muamua ma meli fefiloi o se tuufaatasiga o meli e faatupulaia e faasalalauga faaeletoni faatasi ai ma le faaooina atu i tulaga masani e ala i faiga tau meli;

- (g) o galuega tau tupe o meli e pei o nofoaga e totogi ai aitalafu;
- (h) tupe faamomoli faava o malo faatasi ma isi vaega e tuuina atu auaunaga.

8. E mafai e le Minisita ona tuuina atu faatonuga i le SamoaPost-(1) Afai e manatu le Minisita o se tulaga e manuia ai tagata lautele pe a faapea ona faia, e mafai e ia ona tuuina atu i le SamoaPost ni faatonuga tusitusia e faasino i le tuuina atu e le SamoaPost o se galuega faaagaga tau meli po o se galuega aoao tau meli.

(2) E lē tatau i le Minisita ona tuuina atu se faatonuga i lalo o le faafuaiupu (1) e faasino i fua faatatau o totogi e lafo ai meli.

(3) Afai e tuuina atu e le Minisita se faatonuga i lalo o le faafuaiupu (1), e tatau i le Minisita ona poloaiina se ata o faatonuga ina ia faataatia i luma o le Fono Aoao Faitulafono i totonu o aso fono e 15.

VAEGA 2 SAMOAPOST

9. SamoaPost-(1) O le SamoaPost o se faalapotopotoga tau fefaatauaiga a le Malo mo faamoemoega o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001.

(2) E ao i le SamoaPost ona tuuina atu se galuega aoao tau meli i totonu o Samoa.

(3) E i ai i le SamoaPost le aia tatau faapitoa e tuuina atu ai se galuega faaagaga tau meli i totonu o Samoa.

(4) E mafai e le SamoaPost ona tuuina atu ia galuega tau meli faapisinisi e pei ona ia manatu ua talafeagai ai e tusa ai ma le fuaiupu 8 o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001.

(5) E mafai e le SamoaPost ona faatino o nisi lava gaoioiga faapisinisi e pei ona ogatasi ma le Tulafono o Kamupani 2001 ma Tulafono Faafoe a le SamoaPost ua faia i lalo o lena Tulafono.

10. Faailoga tusi tau meli-(1) E i ai foi i le SamoaPost le aia tatau faapitoa e lolomi ma tuuina atu ai faailoga tusi tau meli i totonu o Samoa.

(2) E mafai e le SamoaPost ona faaleagaina ma faaleaga so o se faailoga tusi e le o toe manaomia.

11. Noataga lautele faale-Malo - E tatau i le SamoaPost ona faatino ana galuega tauave i se faiga e ogatasi ma:

- (a) so o se faiga faavae lautele lea o lo o faailoa atu ai i faatonu o le SamoaPost i lalo o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001; ma
- (b) so o se faatonuga e tuuina atu e le Minisita i lalo o le fuaiupu 8; ma
- (c) so o se faatonuga e tuuina atu e le Pule Faatonu e tusa ai o tuutuuga tau fesootaiga; ma
- (d) noataga a Samoa i lalo o so o se feagaiga.

12. Tuutuuga ma aiaiga o galuega tau meli e tuuina atu e le SamoaPost-(1) I le noatia ma le fai fuafua i so o se aiaiga manino o lenei Tulafono po o so o se isi lava Tulafono, o tuutuuga ma aiaiga o se galuega tau meli ua tuuina atu mo se tagata e le SamoaPost o:

- (a) le a lava le tulaga e malilie i ai le SamoaPost ma le tagata i tuutuuga ma aiaiga mo le tuuina atu o le auaunaga o tuutuuga ma aiaiga ua malilie faatasi i ai; ma
- (b) le a lava le tulaga ua lē malilie i ai le SamoaPost ma le tagata i tuutuuga ma aiaiga - o tuutuuga ma aiaiga ua fuafuaina e le SamoaPost e mafai ona faaogā i le tuuina atu o le auaunaga.

(2) E aunoa ma le faatapulaaina o le faafuaiupu (1), o tuutuuga ma aiaiga ua fuafuaina e le SamoaPost e mafai ona faia ai ni aiaiga e tusa ai o:

- (a) le ituaiga o mea e ono mafai ona aveina e le meli ma auala e ono mafai ona aveina ai ituaiga o mea eseese; ma
- (b) le aveina o tusi ma isi mea tau meli; ma
- (c) fua faatatau o totogi o le lafoina o meli; ma

- (d) le totonu o le lafoina o meli, e aofia ai le tuuina atu ma le faatauina o faailoga tusi e lafo ai meli, le faailogaina muamua o mea tau meli ma le faaaogāina o masini faatagaina aloaia mo le faailogaina o tusi; ma
- (e) tusi e le i faaooina atu ma isi mea (e aofia ai le faalēaogāina ma le faatamaia o ia mea).

13. Faiga faavae o le faatulagaina o tau-(1) E tatau i le Minisita ona fuafuaina le faiga faavae o le faatulagaina o tau mo galuega aoao tau meli ina ia tuuina atu e le SamoaPost.

(2) E ao i le Minisita ona feutagai ma le SamoaPost a o le i faia pe suia le faiga faavae o le faatulagaina o tau i lalo o le faafuaiupu (1).

(3) I le fuafuaina o le fua faatatau o totonu o le lafoina o meli mo galuega aoao tau meli, e ao i le SamoaPost ona galue ia ogatasi ma le faiga faavae o le faatulagaina o tau ua faia i lalo o le faafuaiupu (1).

(4) E tatau i le Minisita ona poloaiina se ata o le fuafuaga ua faia i lalo o le faafuaiupu (1) ina ia faataatia i luma o le Fono Aoaofaitulafono, i totonu o le 15 aso fono.

(5) O galuega tau meli faapisinisi e tuuina atu e le SamoaPost o le a tatau ona i ai le faasologa o tau e fua i le maketi ma o le a lē noatia ai i le faiga faavae o le faatulagaina o tau ua faia i lalo o le faafuaiupu (1).

14. Taulumaga e faagaoioia ai le SamoaPost-(1) E tatau i le SamoaPost ona saunia taiala faataatitia o faatulagaina ai ana taulumaga e faagaoioia ai e faasino i mataupu e pei o:

- (a) le faatamaia o faailoga e lafo ai tusi ia ua faaleagaina po o ua sili atu i manaoga; ma
- (b) le tatalaina ma le faatamaia o meli ua lē mafai ona faaooina atu; ma
- (c) le tatalaina ma le faatamaia o meli ua masalomia o lo o tauaveina ai ni meafaitino e lē tusa ai ma ala o le tulafono po o meafaitino matautia; ma
- (d) so o se isi mataupu ua faatonuina.

(2) O taiala faataatitia ua saunia i lalo o le faafuaiupu (1) e ao ona ogatasi ma:

- (a) le Tulafono o Faalapotopotoga a le Malo (Faatinoga o Galuega ma le mafai ona tali atu) 2001; ma
- (b) le Tulafono o Kamupani 2001; ma
- (c) le Tulafono o le Pulega o Tupe a le Malo 2001; ma
- (d) so o se faatonuga i lalo o le fuaiupu 8.

(3) O taiala faataatitia ua saunia i lalo o le faafuaiupu (1) ma so o se fesuiaiga i na taiala faataatitia e ao ona faaoo atu i le Pule Faatonu ma le Pule ma Suetusi Sili mo le faamaoniga.

15. Tulaga faataatitia o faatinoga ia ausia e le SamoaPost-(1) E mafai e nei tulafono faatonuonu ona faatonuina tulaga faataatitia ia ausia mo galuega faaagaga tau meli.

(2) O tulaga faataatitia o faatinoga ua faatonuina e ao ona fesootai i:

- (a) le tulaga o faagasolo ai, vave po o le sao atoatoa o le faaooina atu o meli; po o
- (b) le tulaga o le mauaina po o le avanoa o Pusa meli po o isi lava nofoaga e faatoai atu i ai meli.

(3) E aunoa ma le faatapulaaina o le faafuaiupu (1), e mafai ona fesootai tulaga faataatitia o faatinoga ua faatonuina i auala ua fuafuaina ai le tulaga o le auaunaga o le faaooina atu o meli mo se nofoaga faapitoa.

(4) E faaopoopo i so o se manaoga ua faamaoti i totonu o le Tulafono o Kamupani 2001 po o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001, e faasino i tiute ma matafaioi a se faatonu o se kamupani, o le tiute lava o faatonu a le SamoaPost le faia o fuafuaga e faamautinoa ai le tausisia e le SamoaPost o so o se tulaga faataatitia o faatinoga ua faatonuina mo faamoemoega o le faafuaiupu (1).

16. Manaoga tau lipoti-(1) E faaopoopo i so o se manaoga tau lipoti i lalo o le Tulafono o Kamupani 2001 po o le Tulafono o Faalapotopotoga a le Malo (Faatinoga o Galuega ma le mafai ona tali atu) 2001, e tataui i le Samoa Post ona saunia

ma tuuina atu i le Minisita ma le Pule Faatonu se lipoti faaletausaga ua faatulagaina ai:

- (a) le tau o le tuuina atu o galuega aoao tau meli;
- (b) le tulaga aupito sili ona lelei o galuega mo mea tau meli taitasi i le atunuu atoa;
- (c) atinae eseese o le SamoaPost;
- (d) taumafaiga mo le faaleleia o tulaga o auunaga ma atinae eseese mo galuega aoao tau meli; ma
- (e) so o se isi lava faamatalaga ua faatonuina.

(2) So o se faamatalaga maaleale faapisinisi i totonu o le lipoti i le Minisita ma le Pule Faatonu e lē tatau ona faalauiloa faalauaitete.

17. Nofoga o galuega tau meli-(1) E ao i le SamoaPost ona saunia avanoa i galuega aoao tau meli e ala i nofoaga o galuega tau meli.

(2) O se nofoaga o galuega tau meli e ao ona tuuina atu le galuega:

- (a) mo le aoina ma le faaoina atu o meli tusi taitasi ma meli afifi i Pusa meli i Fale Meli; ma
- (b) mo le faatauina atu o faailoga tusi po o isi auala e faaaogā ai masini e fua ai tofogi o meli; ma
- (c) mo le lisiina o Pusa meli a le Fale Meli.

(3) O se nofoaga o galuega tau meli e lē manaomia ona avea ma fale meli po o se lala tau meli.

(4) O se Pusa meli a le Fale Meli o faasinomia i totonu o le faafuaiupu (2) e lē manaomia ona avea ma Pusa meli faitino a le Fale Meli peitai e mafai ona avea ma tuatusi tau meli mo le faaoina atu o mea tau meli.

18. Pusa meli - E mafai e le SamoaPost ona faatuina, tausia ma faaaogā pusa e lafo i ai tusi i totonu o so o se auala a le Malo, oga-ala po o ala tetele po o i so o se isi lava nofoaga faitete.

19. Tuueseeseina o galuega faaagaga tau meli ma galuega tau meli faapisinisi - E ao i le SamoaPost ona faamautinoa e faapea ia leai se tulaga e fesopoai ai tulaga

faasaofaga i le va o galuega faaagaga tau meli ma galuega tau meli faapisinisi o tuuina atu e le SamoaPost.

20. Faamatalaga tau tupe a le SamoaPost-(1) E ao i le SamoaPost ona tausia o ia faamatalaga tau tupe e pei ona manaomia i lalo o le Tulafono o Kamupani 2001 ma le Tulafono o Faalapotopotoga a le Malo (Faatinoga o Galuega ma le mafai ona tali atu) 2001.

(2) E faaopoopo i faamatalaga tau tupe ua faamaotiina i totonu o le faafuaiupu (1), e ao i le SamoaPost ona tausia faamatalaga tau tupe lea ua aiaia ai le tuueseeseina i luga o se faavae o tau o faamatalaga tau tupe o tupe maua ma tupe alu e tusa ai o galuega aoao tau meli ma tupe maua ma tupe alu e tusa ai o galuega tau meli faapisinisi.

21. Puipuigamalu mai nisi tagi - E leai se tagi po o se tualumaga e faia faasaga i le SamoaPost po o so o se isi lava tagata e faasino i so o se mea ua leiloa po o mo se mea ua faaleagaina, po o e ono mafai ona faaleagaina, e se tagata ona o so o se gaoioiga po o le faia o se mea na lē faia po o le lē faia ina ia faia i le agaga lelei po o i le ave ma sui o le SamoaPost e faasino i le tauaveina o se galuega aoao tau meli.

22. Solia o se galuega faaagaga tau meli - O se tagata e ese mai i le SamoaPost o ia lea o lo o auai i se amioga e aafia ai se soliga o se aia tatau faapitoa o lo o i ai i le SamoaPost i lalo o lenei Tulafono, ua na faia se soligatulafono ma e noatia i se sala tupe e lē silia le 5,000 iunite tau faasalaga mo se soligatulafono muamua ma le 10,000 iunite tau faasalaga mo se soligatulafono e mulimuli ane ai.

VAEGA 3 O GALUEGA TAUAVE MA MALOSIAGA O LE PULE FAATONU

23. Matafaioi, galuega tauave ma malosiaga o le Pule Faatonu-(1) O le Pule Faatonu e i ai matafaioi ma galuega tauave ua taua e faapea:

- (a) ia faamautinoa e faapea ua ausia lelei e le SamoaPost noataga a Samoa i lalo o tulafono faatonutonu a le UPU e ala i galuega aoao tau meli ua faamaonia; ma
- (b) ia faamautinoa e faapea ua ausia e le SamoaPost tulaga faataatitia tau faatinoga sa manaomia e tusa ai o le aiaiga o galuega faaagaga tau meli; ma
- (c) ia faamautinoa e faapea o fua faatatau o le lafoina o meli ua faaee atu e le SamoaPost mo galuega aoao tau meli, ua ogatasi ma faiga faavae o tau ua fuafuaina e le Minisita, i lalo o le fuaiupu 13; ma
- (d) ia faamautinoa e faapea ua talafeagai tulaga tau tupe a le SamoaPost mo galuega ua ia tuuina atu, ma e leai se saofaga o tupe totogi i le va o galuega faaagaga tau meli ma galuega tau meli faapisinisi ua tuuina atu e le SamoaPost; ma
- (e) ia tagofia faasea e uiga i le tuuina atu o galuega faaagaga tau meli e le SamoaPost; ma
- (f) pe afai e talafeagai ai, ia tuuina atu faatonuga i le SamoaPost e tusa ai o fesootaiga tau lotoifale; ma
- (g) ia faamasinoina i luga o mataupu tau fesootaiga tau lotoifale.

(2) E mafai e le Pule Faatonu ona talosagaina le SamoaPost ina ia tuuina atu faamatalaga ia ua manatu le Pule Faatonu e talafeagai ai i le tauaveina o galuega faatino ma matafaioi ua faatulaga mai i le faafuaiupu (1) ma e ao i le SamoaPost ona tausisia lea talosaga.

(3) E mafai e le Pule Faatonu ona faia ia poloaiga, o taualumaga, taiala ma tulafono faafoe e pei ona manatu le Pule Faatonu ua talafeagai ai e faasino i le faia ma le faatinoina o galuega tauave ma matafaioi, i lalo o le faafuaiupu (1) ma e mafai e le SamoaPost ona tausisia so o sea poloaiga.

(4) E mafai e se poloaiga i lalo o le faafuaiupu (3) ona faatonuina le SamoaPost ina ia faia nisi gaioiga ua manatu e talafeagai ai, ina ia faamautu ai e faapea ua tuuina atu e le SamoaPost ia galuega tau meli ina ia tusa ai ma lenei Tulafono.

24. Talosaga Tete e ma Iloiloga o Poloaiaga a le Pule

Faatonu-(1) E faatoa mafai ona faia se talosaga tete mai se poloaiaga a le Pule Faatonu i lalo o lenei Tulafono:

(a) i luga o so o se mataupu faaletulafono; ma

(b) i le Faamasinoga Sili i luga o le faatagaga a le Faamasinoga.

(2) O se tusi talosaga mo se faatagaga e talosaga tete ai, e tatau ona faia i totonu o le tolusefulu aso ina ua tuanai ai le aso o le poloaiaga lea ua faia ai le talosaga.

(3) E tatau ona aumai se talosaga tete i totonu o le 60 aso ina ua tuanai le aso lea na tuuina atu ai le faatagaga e talosaga tete ai.

(4) I luga o se talosaga tete i lalo o lenei fuaiupu, e mafai e le Faamasinoga Sili ona aumai so o se faauigaga e faapea o lo o ogatasi ma saililiga o le faamatalaga moni ua faia i totonu o le poloaiaga.

(5) E ui i so o se isi lava tulafono, i le fofogaina o se talosaga tete i lalo o lenei fuaiupu, e na o le Faamasinoga Sili e i ai le puleaga faa-faamasinoga ma le malosiaga:

(a) e fuafua ai le tulafono talafeagai; ma/po o

(b) e faaaliga manino o le poloaiaga lea e mafua ai le talosaga tete po o vaega o le poloaiaga, ua tusa ai ma le tulafono po o le lē tusa ai ma le tulafono; ma/po o

(c) e toe faafoi le poloaiaga i le Pule Faatonu mo se isi faaiuga a le Pule Faatonu e tusa ai ma so o se faaiuga ma/po o se isi faaaliga manino ua faia i lalo o parakalafa (a) ma/po o (b).

25. Ia lipoti atu e le Pule Faatonu le tausisia o tulaga faataatia o faatinoga ua faatonuina ma isi mataupu-(1) A

itiiti mai e faa-tasi i le tausaga, e tatau ai i le Pule Faatonu ona lipoti atu i le Minisita, i luga o tulaga ia ua faafetaiaia ai e le SamoaPost ana noataga i lalo o le Tulafono ma so o se tulaga faataatia tau faatinoga ua faatonuina.

(2) E tatau i le Pule Faatonu ona aofia ai i totonu o le lipoti so o se isi lava mataupu ua ia manatu ua talafeagai ai i galuega tauave i lalo o le fuaiupu 23.

26. Tulaga tutoatasi o le Pule Faatonu - Mo le alofia o tulaga lē mautinoa, ua faaaogāina ai le fuaiupu 8(3) o le Tulafono o Fesootaiga 2005, i le matafaioi, galuega tauave ma malosiaga a le Pule Faatonu i lalo o lenei Tulafono.

VAEGA 4 TATALAINA MA LE SUEINA O MELI

27. O mea tau meli e lē mafai ona faaooina atu-(1) Afai o se mea tau meli:

- (a) ua lē mafai ona faaooina atu i le tagata ua faamoemoe e ave i ai, ona ua lē faatuatusiina po o ua lē sao po o ua sese le faatuatusiina; ma
- (b) ua lē mafai ona toe faafoiina atu i le tagata na lafo mai ai ona ua le o i ai le tuatusi o le tagata na lafo mai ai, po o ua lē faaalii ai le sao po o ua sese ona faaali mai,

e mafai e se tagata faigaluega a le SamoaPost, e tusa ai ma taulumaga tau faatinoga a le SamoaPost, ona tatalaina mea tau meli ma susesue mea eseese o i ai mo le faamoemoe o le mauaina o faamatalaga atoatoa mo le:

- (a) faaooina atu ai mea tau meli i le tagata ua faamoemoe e ave i ai; po o
- (b) le toe faafoi o mea tau meli i lē na lafo mai ai.

(2) Afai ua lē mafaia e le SamoaPost ona faia se faaiuga i lē na lafo mai ai le mea tau meli, e mafai ona ia malupuipua a itiiti mai e tolu (3) masina.

(3) Afai sa malupuipua e le SamoaPost sea mea tau meli i se tulaga malupuipua a itiiti mai e tolu (3) masina, ae peitai ua tumau pea le lē tapaina, e mafai e le SamoaPost ona faaleagaina loa po o le lafoaia o se mea tau meli i se isi faiga e ese ai e pei ona ia manatu ua talafeagai ai.

28. Mea e toe faaleleia - E mafai e se tagata faigaluega o le SamoaPost e tusa ai ma tualumaga tau faatinoga a le SamoaPost, ona tatalaina se mea tau meli ma le faamoemoe o lona toe faaleleia po o mea o lo o aofia ai ina ia mafai ai ona saogalemu le mea tau meli mo le aveina atu e ala i le lafoina.

29. O mea tau meli e mafai ona totogiina tiute-(1) Afai o i ai ni mafuaaga tatau e talitonuina ai e faapea o se mea tau meli e aofia ai, po o o lo o i ai, so o se mea e ono totogiina le tiute, po o lea sa tauaveina e solia o se tulafono a Samoa, e faasino i le faaulufaleina mai i totonu, po o le faaulufafoina atu mai Samoa o lea mea, e mafai e le tagata faigaluega a le SamoaPost ua faatagaina mo lea faamoemoe, ina ia tusa ai ma tualumaga tau faatinoga a le SamoaPost, ona tatalaina le mea tau meli, i le auai ai o le Tagata Ofisa o le Tiute.

(2) E mafai e le Tagata Ofisa o le Tiute i lona auai ai a o tatalaina le mea tau meli, ona iloiloina le mea tau meli e siaki ai pe o aofia ai i po o i ai so o se mea e ono totogiina ai se tiute po o sa aumai faasolitulafono e solia ai se tulafono a Samoa.

(3) Afai ua maua i le mea tau meli e le o aofia ai i po o maua ai so o se mea ua faasinomia i totonu o le faafuaiupu (1), e ao loa ona tapunia le mea tau meli ma toe faafoi i le faiga masani o le feaveaiga o meli.

(4) Afai ua maua i le mea tau meli o lo o aofia ai i po o maua ai so o se mea ua faasinomia i totonu o le faafuaiupu (1), e mafai ona tagofia loa le mea tau meli ma mea o lo o aofia ai ina ia tusa ai ma so o se tulafono talafeagai a Samoa.

30. O mea tau meli ua talitonuina o lo o aofia ai vailaau faasaina po o isi mea faasaina-(1) E faaaogāina lenei fuaiupu i se mea tau meli lea ua talitonuina i se tulaga talafeagai e le Tagata Ofisa o le Tiute po o se leoleo, o lo o aofia ai i po o maua ai nakoti, vailaau faatonuina po o isi vailaau tuufaatasia po o isi mea faasaina lea sa aumaia faasolitulafono e solia ai se tulafono a Samoa.

(2) E mafai e le Tagata Ofisa o le Tiute po o se leoleo, i le tuanai ai ona logoina se tagata faigaluega o le SamoaPost ua faatagaina mo lea faamoemoe, ona tatalaina le mea tau meli i le auai ai o lea tagata faigaluega o le SamoaPost.

(3) Afai ua maua i le mea tau meli e le o aofia ai i po o maua ai so o se mea ua faasinomia i totonu o le faafuaiupu (1), e ao loa ona tapunia le mea tau meli ma toe faafoi i le faiga masani o le feaveaiga o meli.

(4) Afai ua maua i le mea tau meli o lo o aofia ai i po o maua ai so o se mea ua faasinomia i totonu o le faafuaiupu (1), e mafai ona tagofia ina ia tusa ai ma so o se tulafono talafeagai a Samoa.

31. O mea tau meli ia i ai faatasi ma se faasilasilaga o le tatalaina-(1) Afai ua tatalaina se mea tau meli e pei ona faatagaina e se aiaiga o lenei Tulafono, ma o le a toe faafoi i le faiga masani o le feaveaiga, e mafai e le SamoaPost ona faamaonia i luga o le pepa o lo o afifi ai meli, po o luga o se pepa e faailoa ai ua faapipii i lona pepa o lo o afifi ai, se faasilasilaga manino e faapea sa tatalaina le mea tau meli ma faapea ona faamatala manino ai le faamoemoe lea sa tatalaina ai.

(2) E mafai e le SamoaPost ona teuina se faamaumauga o mea uma sa tatalaina e tusa ai ma aiaiga o lenei Tulafono ma e tatau ona tuuina atu lea faamaumauga i le Pule Faatonu pe afai ua talosagaina ia faapea ona fai.

32. Tagofiaina o mea matautia po o mea oona-(1) Afai ua iloa e se tagata faigaluega o le SamoaPost, po o e i ai mafuaaga talafeagai ua masalomia ai, e faapea o se mea tau meli o lo o maua ai se mea lea e mafai po o e ono mafai ona pa, matautia pe oona, e mafai loa ona tagofia le mea tau meli e tusa ai ma aiaiga talafeagai o taualumaga tau faatinoga a le SamoaPost.

(2) Afai e matautia pe solitulafono le mea tau meli, ua mafai loa ona faatamaia vave e se tagata faigaluega o le SamoaPost e tusa ai ma taualumaga tau faatinoga a le SamoaPost.

(3) Afai ua talitonu se tagata faigaluega a le SamoaPost, i luga o mafuaaga talafeagai e faapea:

(a) o le mea tau meli e ono mate, pala, faaleagaina po o le fano i se isi faiga e ese ai; po o

(b) o le mea tau meli ua po o o le a foliga mai e matautia, ma ua faapea ona tatau ai i le tulaga e alofia ai le popolega i le afaina ai o so o se tagata

po o meatotino, ona faatamaia pe lafoaia vave loa le mea tau meli i se isi faiga e ese ai, e ao i se tagata faigaluega a le SamoaPost ona faatamaia pe lafoaia le mea tau meli i se isi faiga e ese ai, e tusa ai ma aiaiga talafeagai o tualumaga tau faatinoga a le SamoaPost.

(4) E mafai e le SamoaPost ona faamautu e faapea, a o le i faatamaia le mea tau meli, ia faamauina faamatalaga ua taua i lalo, i le tulaga lautele e molimauina ai:

- (a) le igoa o lē na auina mai ai ma lona tuatusi;
- (b) le igoa o lē ua faamoemoe e taliaina ma lona tuatusi;
- (c) o mea o lo o aofia ai i le mea tau meli.

(5) Afai ua faamauina le igoa ma le tuatusi o lē na auina mai ai, e mafai e le SamoaPost i se taimi vave lava e mafai ona faatino ai i le tuana'i ai o le faatamaia o le mea tau meli, ona tuuina atu se faasilasilaga tusitusia i lē na auina mai ai, e faailoa i ai le faatamaia o le mea tau meli ma mafuaaga mo lona faatamaiaina.

33. Lafoaia i le tuana'i ai o se moliaga ua faamaonia faaletulafono - I luga o le moliaga ua faamaonia faaletulafono o so o se tagata mo se soligatulafono e faasaga i lenei Tulafono e aafia ai so o se mea tau meli, e mafai e le faamasinoga na faamaonia moliaga faaletulafono, i le faaopoopo i ai o so o se isi lava faaiuga po o le faia o so o se isi lava poloaiga e tusa ai o le soligatulafono, ona poloaia e faapea ua faoa atu i le Malo le mea tau meli; ma i lenei tulaga ua mafai loa ona faatamaia le mea tau meli sa faoa atu po o le lafoaia i se isi faiga e ese ai e pei ona faatonuina e le Minisita.

34. E lē noatia le SamoaPost ma tagata faigaluega mo gaoioiga e faia i le agaga lelei i lalo o lenei Vaega - E noatia a le o le SamoaPost po o se tagata faigaluega o le SamoaPost, i se gaoioiga po o isi tualumaga mo le faatamaiaina o, po o e faasino i se gaoioiga sa faia pe sa lē faatagaina ona faia i le agaga lelei, i le faagaoioiga po o le faatinoga, po o faamoemoe e faagaoioi po o faamoemoe e faatino, se malosiaiga po o tiute tauave i lalo o lenei Vaega.

VAEGA 5
SOLIGATULAFONO E FAASINO
I LE TULAGA ALOAIA O MELI

35. Tatalaina e aunoa ma se faatagaga o mea tau meli - O se tagata, e le:

- (a) o lē na faatuatusi i ai po o se sooupu, tagata ofisa po o se tagata faigaluega a lē na faatuatusi i ai; po o
- (b) se tagata faigaluega o le SamoaPost sa faatagaina mo lea faamoemoe ma galue e tusa ai ma tualumaga tau faatinoga a le SamoaPost; po o
- (c) se Tagata Ofisa o le Tiute po o se leoleo o galue e tusa ai ma lenei Tulafono,

o ia lea ua tatalaina po o taumafai e tatala so o se mea tau meli, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina, po o se sala tupe e lē silia le 100 iunite tau faasalaga, po o faasalaga uma e lua.

36. Faailoa atu o faamatalaga e maua mai mea tau meli-(1) I le noatia ma le fai fuafua i le faafuaiupu (3), o se tagata faigaluega o le SamoaPost po o se isi kamupani e tuuina atu galuega tau meli lea ua faailoa atu e aunoa ma se mafuaaga lelei ma talafeagai, so o se faamatalaga sa maua mai se mea tau meli a o faagasolo tiute tauave o lea tagata faigaluega, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o i se sala tupe e lē silia le 100 iunite tau faasalaga, po o faasalaga uma e lua.

(2) I le noatia ma le fai fuafua i le faafuaiupu (3), o se tagata ofisa o le Tiute po o se leoleo o ia lea ua na faailoa atu e aunoa ma se mafuaaga lelei ma talafeagai so o se faamatalaga sa maua mai se mea tau meli a o faagasolo tiute tauave o lea tagata ofisa ua ia faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

(3) E lē faaaogāina le faafuaiupu (1) ma le (2) pe afai o le faailoaina atu:

- (a) ua talafeagai i luga o se mafuaaga tatau mo le faamamaluina o le tulafono tau soligatulafono; po o
- (b) ua talafeagai i luga o se mafuaaga tatau mo le puipuiga o tupe maua a le atunuu; po o
- (c) ua manaomia i se isi faiga e ese ai po o ua faatagaina e po o i lalo o le tulafono.

37. Gaoia o mea tau meli - O se tagata o ia lea ua lē faamaoni ma gaoi se mea tau meli, (e aofia ai se mea tau meli lea ua foliga mai ua leiloa po o ua faaooina sese atu e po o i luga o le avea ai ma sui o le SamoaPost po o ua leiloa i le tulaga o le faaooina atu i le SamoaPost) faatasi ai ma le faamoemoe e taofia tumau ai lea mea tau meli a le isi tagata, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

38. Faao atu i se tulaga lē sao o mea tau meli-(1) O se tagata o ia lea ua faamoemoe e taulamua i le faaooina atu o se mea tau meli i, po o le mauaina e, se tagata e ese mai i lo le tagata lea e tuusao i ai le mea tau meli, po o le sooupu ua faatagaina a lea tagata, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

(2) O se tagata o ia lea ua na maua i se tulaga lē faamaoni le faaooina atu, po o le taliaina o se mea tau meli i le tulaga o le lē lafoina atu tuusao i lea tagata, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

39. Faailoga tusi tau meli ua sainia faagaoi - O se tagata o ia lea:

- (a) ua saini faagaoi se faailoga tusi e lafo ai tusi, po o ua faaogāina po o ua tuuina atu se faailoga tusi e lafo ai tusi, ma le iloa lelei ua sainia faagaoi; po o

- (b) taumafai e saina faagaoi se faailoga tusi e lafo ai tusi po o taumafai e faaaogā po o le tuuina atu o se faailoga tusi e lafo ai tusi ma le iloa lelei ua sainia faagaoi,

ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

40. Faaaogāina o faailoga tusi sa muai faaaogāina, faaleagaina foliga po o ua tapeina - O se tagata o ia lea ua faaaogāina mo galuega tau meli se faailoga tusi mo le lafoina o meli:

- (a) lea sa muai faaaogāina mo auunaga tau meli; po o
 (b) lea sa tapeina; po o
 (c) lea sa faaleagaina foliga,

ua faia se soligatulafono ma e noatia i le nofosala i le falepuipui mo se vaitaimi e lē silia le ono (6) masina po o se sala tupe e lē silia le 50 iunite tau faasalaga, po o faasalaga uma e lua.

41. Faalavelaveina o le feaveaia o mea tau meli i le meli - O se tagata o ia lea ua faamoemoe e faalavelaveina pe taofiofia le feaveaia e ala i le lafoina i le meli o so o se meli, ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

VAEGA 6 SOLIGATULAFONO LAUTELE

42. Lafoina i le meli o mea matautia ma isi mea faapena-(1) O se tagata o ia lea ua faia ma le faamoemoe ina ia aveina i le meli se mea tau meli lea e aofia ai:

- (a) se vailaau oona po o mea oona, po o so o se meaola ua mate; po o
 (b) se fana-ia, se mea matautia po o se mea e ono faatamaia ai po o se mea faasuavaia; po o

(c) se pepa o faamatalaga mataga, ua faia se soligatulafono, ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

(2) O se tagata o ia lea ua faia ma le faamoemoe e aveina i le meli se mea tau meli ma le faamoemoe e faatauana ai se talitonuga sese e faapea:

(a) o le mea tau meli o lo o aofia ai, afifi ai po o ua maua ai se fana-ia po o se mea matautia po o se mea e afaina ai po o se mea leaga; po o

(b) se fana-ia, po o se mea matautia po o se mea e afaina ai po o se mea leaga ua tuua po o o le a tuua i so o se nofoaga,

ua faia se soligatulafono ma e noatia i le nofosala i le falepuipui mo se vaitaimi e lē silia le 12 masina po o se sala tupe e lē silia le 100 iunite tau faasalaga, po o faasalaga uma e lua.

43. Faapogai i le aveina o vailaau nakoti i le meli - O se tagata o ia lea ua faamoemoe e faapogai ina ia aveina atu i le meli, e aunoa ma se mafuaaga faaetulafono se mea tau meli lea o lo o aofia ai, afifi ai po o ua maua ai nakoti po o se vailaau faatonuina, ua faia se soligatulafono ma e noatia i le nofosala i le falepuipui mo se vaitaimi e lē silia le lua (2) tausaga po o se sala tupe e lē silia le 200 iunite tau faasalaga, po o faasalaga uma e lua.

44. Satiaina o pusa meli - O se tagata o ia lea e aunoa ma se mafuaaga faaetulafono e tatalaina ai se pusa e lafo i ai meli po o le aia fua i se pusa e lafo i ai meli, ua faia se soligatulafono ma e noatia i le nofosala i le falepuipui mo se vaitaimi e lē silia le ono (6) masina po o se sala tupe e lē silia le 50 iunite tau faasalaga, po o faasalaga uma e lua.

VAEGA 7 AIAIGA ESEESE

45. Tupe faapoloaiga ma tupe faapoloaiga e lafoina i le meli-(1) E ao i le SamoaPost ona faia ni faatulagaga mo le tuuina atu ma le totogiina o poloaiga tau tupe ma tupe faapoloaiga e lafoina i le meli:

(a) i totonu o Samoa; ma
 (b) le va o Samoa ma se atunuu i fafo,
 ma mo le faamatalaga tau tupe mo, ma tupe faameaalofa o, tupe
 sa manaomia mo lea faamoemoe.

(2) O se poloaiga tau tupe po o se poloaiga o tupe feaveai i
 le meli ua tuuina atu i lalo o lenei Tulafono, ma ua lē tauaaoina
 mo le tologiina i totonu o le 12 masina, mai le aso mulimuli o le
 masina na tuuina atu ai, e tatau ona tologiina i lalo o ia tuutuuga
 e pei ona fuafuaina e le SamoaPost.

(3) E tatau i le SamoaPost ona faatino le puipuiga talafeagai
 ma le faautauta pe a tologiina se aofaiga o poloaiga tau tupe po
 o se tupe feaveai i le meli, i le fuafuaina e faapea o le tagata e
 tauaaoina le poloaiga tau tupe po o se tupe feaveai i le meli mo
 le tologiina ua talafeagai lelei e mauaina le aofaiga o lea
 poloaiga tau tupe po o le tupe feaveai i le meli.

(4) I le noatia ma le fai fuafua i le faafuaiupu (3), e lē tatau
 ona ono lagolagoina se tagi po o nisi taualumaga e faasaga i le
 SamoaPost, e tusa ai o se poloaiga tau tupe po o se tupe feaveai
 i le meli, i le tuanai ai o le tologiina i, po o ai lava ua tauaaoina i ai,
 pe afai sa tologiina e aunoa ma se faiga tau faasese po o se amio
 lē pulea na faia ma le loto i ai.

46. Tulafono Faatonutonu-(1) E mafai e Le Ao o le Malo i
 le faia i luga o le fautuaga a le Kapeneta ona faia tulafono
 faatonutonu e faatonuina ai mataupu:

- (a) sa manaomia pe sa faatagaina e lenei Tulafono ina ia
 faatonuina; po o
 - (b) ua tatau po o ua talafeagai ona faatonuina mo le
 faatinoina po o le aloaiaina i lenei Tulafono.
- (2) E mafai ona faia tulafono faatonutonu e aunoa ai ma le
 faatapulaaina o le tulaga lautele o le faafuaiupu (1), e tusa ai i:
- (a) le faoa ma le faaleagaina o mea tau meli sa lafoina i
 le meli; ma
 - (b) le faatulagaga mo le aoina o tiute a le ofisa o tiute ma
 isi tiute e ono tologiina e faasino i mea tau meli
 sa lafoina i le meli; ma
 - (c) le tagofiaina o mea tau meli lea e mafai ona maua ai
 oloa ia e ono tologiina ai tiute a le ofisa o tiute
 po o isi tiute; ma

- (d) le tatalaina ma le susesueina o mea tau meli, ma le susesueina o mea eseese o i ai i le mea tau meli sa lafoina i le meli; ma
- (e) faatonuina sala tupe ma faasalaga e lē silia le 10 iunite tau faasalaga po o le nofosala i le falepuipui mo se vaitaimi e lē silia le tolu (3) masina, po o faasalaga uma e lua, mo soligatulafono e faasaga i tulafono faatonutonu.

47. Soloia-(1) I le noatia ma le fai fuafua i le faafuaiupu (2) ua soloia nei le Tulafono o Fale Meli 1972.

(2) O se soligatulafono i lalo o le Tulafono o Fale Meli 1972, lea sa faia a o lumanai ai le aso e amata faamamaluina ai, e mafai ona faatino se moliaga i lalo o lea Tulafono, e ui lava i le soloia o lea Tulafono e le faafuaiupu (1) ma so o se aiaiga o lea Tulafono lea e talafeagai mo ia faatinoga o moliaga, ua faatatauina ai o le a lē soloia mo faamoemoega o na moliaga faaletulafono.

(3) O laisene taitasi uma po o pemitā ua faamalosia i lalo o le Tulafono muamua, i le aso e amata faamamaluina ai, e tatau i le tulaga e faapea e mafai ona faia faapea, faaauau ma aloaia i lalo o aiaiga tutusa o lenei Tulafono seia oo i lea taimi e pei ona faamutaina ai le laisene po o le pemitā, po o ua faalēaogāina i lalo o aiaiga o lenei Tulafono.

(4) I totonu o lenei fuaiupu:

“aso e amata faamamaluina ai” o lona uiga o le aso e faatinoina ai lenei fuaiupu;

“o Tulafono muamua” o lona uiga o le Tulafono o Fale Meli 1972 ma le Tulafono o Galuega tau Meli ma Fesootaiga 1999.

O le Tulafono o Galuega Tau Meli 2010 o lo o faafoeina e le Matagaluega o Fesootaiga ma Faamatalaga Tekonolosi.

**Lolomiina e le Failautusi o le Fono Aoao Faitulafono,
i le pule a le Fono Aoao Faitulafono.**